

晚

晴

移

詩

匯

晚晴簃詩匯卷一百五十五目錄

翁同龢

二十五首

孫毓汶

六首

夏同善

一首

趙佑宸

一首

洪昌燕

二首

潘祖同

二首

郭長清

二首

陳壽祺

四首

韓欽

一首

沈秉成

二首

錫縝

八首

董文煥

十七首

李應莘

十六首

王闔運

三十八首

晚晴移詩匯卷一百五十五

徐世昌

翁同龢字聲甫號叔平晚號瓶廬又號松禪常熟人咸

豐丙辰一甲一名進士授修撰官至戶部尙書協辦

大學士諡文恭有瓶廬詩彙

詩話文恭師久侍講幄入贊樞廷崇陵最所倚毗  
晚遭多故終老江湖生平未具見於詩淹雅端和  
不失先民矩矱七言古體筆力放縱淵穎堅凝青邱  
雋上殆兼擅其勝尤以戊子至戊戌十年間爲菁華  
所在臨終口占絕句云六十年中事傷心到蓋棺不  
將兩行淚輕向汝曹彈其言之哀如是卒後復官子  
諡志事亦稍白矣

贈吳儒卿鴻綸時余將入都

故人惜遠別索我一幅書我書雖不工點畫頗有餘重是  
故人意抽毫復躊躇墨池忽放光照我眉與鬚天地久衰

颯儼容亦瞿瞿嗟我四十五髮白已蕭疏卻更三數年豈  
不委壑渠恐傷故人心對書長歎歔還君白雪箋鄭重當  
何如

我衰不足陳子老亦可唁頽然一聾翁顏色爲我變勸我  
及秋行要得數相見嗚呼游子心一日幾回旋裝我篋中  
書書斷不成卷檢我篋中衣衣綻誰與縫日月固有時哀  
哉亦既練平生輕別離有淚常默嚥惟有告墓辭百靈共  
懷戀

游秦氏林塘次汴生子禾韻

居然青雀繫蓬門旋覺輕橈雪浪噴暗水過湖偏作態好  
雲冒樹太無根入秋花似將歸客和韻詩難不著痕便擬  
放舟東海去胸中雲夢已全吞

題陳司業

祖范詩冊

知止齋中聽講時兒能執筆父哦詩白頭侍直今何用慚  
負寒機千丈絲

己丑二月偶見文文水龍舟圖發興摹之既錄原詩

於上并和一詩

文作於沿江旅次吾意乃在東西洞庭

具區三萬六千頃容我山椒著一村小拓軒窗臨絕壁更  
栽桑竹滿平原瓊簷詎起湘纍魄玉磬難尋學博孫從此  
入林甘寂寞尙嫌簫鼓隔江喧

題補籬種菊圖

己丑九月餘假滿將還朝二姊以是卷屬題詩豈復有詩意乃作謠諺之

辭以獻

上堂別阿姊阿姊淚如雨問弟爾何爲行役苦不已久留  
固無名簡書況有程姊看隨陽雁汲汲南北征商聲滿天

地如羹亦如沸阿弟襟袂間斑斑家國淚我淚豈妄揮人  
生重乖違敬告世上人弟兄莫分飛示樸吾姊夫古之狂  
狷徒開編見題字令我長嗟吁種菊復種菊今年高過屋  
更待三五年金英絢秋谷

次韻趙次侯

宗建

送行之作

吾生辭墓不辭家未敢忘情且避謹畏此簡書行有日  
人筆札浩無涯君親擔荷微軀弱身世艱難去路賒正合  
遲遲偏汲汲辛峯淒斷白雲遮

三百年來第一家修篁古木靜無譁先生東郭兼南郭處  
士山涯又水涯好事每愁花易落留賓不厭酒頻賒梅顛  
君新構綽有元龍氣尙恨窗櫺面面遮

此閣

先公昔主隱君家鐙火秋堂絃誦譁三萬七千到今日東

西南北總天涯孤兒白髮音容渺老樹孫枝歲月賒此榻  
若因徐孺設莫教去後網塵遮

偶游汗漫卽浮家來聽塵中市語譁小閣帶人天又雨片

帆遲爾水之涯鮒魚香稻常年足破鐵枯銅到處賒昨日

八龍來鼓瑟應知高會是無遮

言雨至天文臺主人鼓琴娛客

矩門丈招飲西城圓通觀出示先德禹民公臨懷仁

### 聖教序敬賦

城西小庵小似螺破壁乃見萬古歌豈惟詩句發深省腕

力山嶽爭嵯峨矩門書律本家學一編手澤勤摩挲焚香

捧示臨古帖中鋒努趯森虞戈敬從八十二載後上溯嘉

慶已巳科朝堂穆穆氣純一人物壽考民風和

是科有八十五歲進

士檢討

賜公於其時登上第出入芸館翔鸞坡十年橐筆事

纂述一麾竟落廬山阿手除巨憝若振槁平反冤獄懲姸

更其間育士功最鉅培植薪樞烝菁莪驚湖鹿洞久銷歇

獨以正學相磋磨先公昔持校士節餘干太末頻經過一

杯亭下品茶罷亦有贈答詩吟哦

先公爲江西學政時公守廣信歸來七

十鬢未皤長安城中有槃藹參禪講學靜有得餘事研究

篆與蝌寒雞三號更五點明星耿耿侵銀河斯時清氣入

泓穎一點一拂無偏頗

公作書必於天未明時

流傳此幅已奇絕後

治帖公刻名全帖當如何矩門先生門可羅殘年觴我安樂窩

微陰釀雪花萼活對坐已覺春風多睦親收族我所敬盡

養焚獨兼癯痾掃除異說尊魯叟如扶毒霧瞻義娥直從

忠孝發根柢匪止藝事恢餘波我詩述德兼志感毋以韻

語相譙訶

座間力言六朝綺靡之習不足學



以素箒乞得南齋諸公詩畫因題短句

一山一水苔岑氣他日澄懷十友看我作湖田垂釣客可  
能曝背話金鑾

爲孫駕航楫題崑崙關題壁圖卽送其之湘臬任

邕州山水天下靈桂勝所紀我熟聆眼光射過古林邑嗟  
五銅柱誰爲銘橫山西來壓郡庭勢如奔馬鞚不停崑崙  
突起屹相向棧木削鐵天門扃彼儂者氏蟠隩陁狄宣徽  
始通車輪蠻花自紅月自白峒谿常碧山常青繡衣使君  
飽六經廿年懶泛珠江舲登高望遠斐有作欲令文字前  
餘腥節華翩翩朝帝廷畫圖入篋留眞形徵詩到我謂我  
健豈知詞筆今彫零我欲貽君雙玉瓶夜涼共話囊底廳  
萊山平生氣誼竹林彥萬里縱跡秋江萍沅湘無波杜若  
新居

馨神女鼓瑟魚龍聽三關回首在何許斗南早釋天弧星  
遲盒兒和題崑崙關圖韻述先世舊德循覽泣然次

韻奉酬

君詩宛轉骨節靈我詩樸直君其聆頭白每說少年事況

有師訓常鐫銘庚戌余受知文定公我昔分曹蒞訟庭攔翻誦律口

不停師言此事非收急勉旃歸試秋闈肩澄懷池館隔一

徑雜花芳草通璫軫葉亭雖小最幽勝二老同看西山青

先公與文定師同寓淀園君時下帷擘眾經我亦未暇揚吳舲玉泉山

前殿門下泥首微帶蝸涎腥王秋榜後余與君在玉泉山前謝恩是日微雨丙

科聯翩對大廷我車西邁嗟勞形臨分唁君憫君病麻衣

血淚吞聲零沛州訪君乞一瓶殺雞炊黍山莊廳潦深橋

窄馬又蹶淋漓衫袖黏浮萍甲戌五月事兩家先芬播德馨宜

蒙天鑒邀神聽艱難會合不復道吾儕努力今晨星

青來爲我作璣闥玩月圖礪秋題詩渺然有湖山之  
思時方校閱未暇奉答放榜前一日次韻以發一  
笑

鹿牀文孫擅家學爲我寫出江南山汝南高賢古詩伯間  
出妙語深淵淵嗟余老懶廁其列一堂二妙難追攀風簾  
官燭坐兀兀臂枯不復親柔翰明珠沙礫溷不辨自憾目  
力今先殫璫廳韻事差可紀意在晁李蘇黃間滄江連天  
碧玉環彷彿夢覩金仙顏牟尼一串親授記信我此語非  
欺謾夢紀夜堂蕭然鐙火閒明日放榜開重關卻嫌官事太  
迫促詩情畫意紛難圓清和節過尙薄寒瞻天日日愁占  
年海棠花落榆葉墮并恐摧我青琅玕

余齋新種竹

昨宵一雨

蘇地脈嘉穀奮起刪茅菅市聲喧闐烏鵲喜西山想見明  
煙巒繼今布濩更優渥至尊方宿郊宮壇今日常雩吾儕此日  
足可樂且放衣帶欹巾冠談詩讀畫了無事一尊相屬同  
加餐明朝鵬鷺各分列旌旗拂拂青雲端

楊村道中

一里得一曲流沙淺復深風帆對灣亞岸柳過河陰若使  
建瓴勢將毋高屋沈津沾蓄眾水慮此一沈吟有建議將  
者恐津郡  
水患益急

將之江右視筱珊姪

海程行過復江城無限蒼涼北望情傳語蛟龍莫作劇老  
夫慣聽怒濤聲

次韻劉香石寄懷

平生六鑿惘天游文囿名場亦暫留江上偶然餘一禿世  
人猶自說三劉薄寒正蠟尋山屐夜雨偏回泛剡舟萬眾  
天涯同悵望豈容宋玉獨悲秋

一漚一發一如來處處圓明性地開難得甘黃攣下澤莫  
因寒拾鈍天台尖風冷月無邊相瘦竹孤花未易才山鳥  
不知吟嘯事看人開卷輒疑猜

吾友吳儒卿

鴻綸

竹橋先生之曾孫也一日得范公

東叔贈先生叙裝卷命題敬賦

一叙尋常耳流傳百卅年魂歸大江水

東叔先生後自沈於江

夢斷

小湖田款款眞交誼恩恩況別筵從知性情厚自不落言  
詮

三世楹書在曾孫九十翁攜筇來市上挾策過牆東屬我

題詩句因之識古風碑陰先友記敢說柳州窮兩先生皆

公所嚴事者也  
小子其何敢辭

題何子貞篆冊為趙生仲舉

緩叟篆勢天下奇如藤如鐵如蛟螭直將古意變斯疑  
結繩而上追皇羲非昔先生振奇士圖書碑版兼鼎彝收  
藏此冊來詫我意我俗眼駭且歎豈知我亦有奇癖先得  
一本無參差呼樽並几發幽賞相視莫逆窮諧嬉吁嗟非  
昔今何在舊山樓下絕履綦有時籃輿過君舍路人怪我  
垂涕洟尋常草木尚敬止何況祕麓長留貽遺孤抱朋忽  
致贈謂於日記中得之苦言惻惻不忍聽展視惘惘若有  
思平生交游徧天下名流韻士如風馳葉潤臣景秋沈復潘  
寅伯凋謝盡我篋不受一物遺森然此例在朋友九原可鑒

千夫知西風吹雨水滂至遑恤已病愁民飢錦鯨卷還坐  
悲嘯空堂且詠東洲詩

病榻不寐

中虛暴下氣先頽幽關崑崙安在哉骨肉至情垂老盡江  
山奇想破空來寒溫迭嬗天無意生死能回世有才獨撥  
殘釭坐長嘯隔牆僮僕漫驚猜

用俞甥調卿韻紀在朝時除夕元旦故事亦西京歲  
華之例也

賜貂溫厚服章身捐酒甘芳飲幾巡祀竈黃羊肥似馬堆  
盤白麪細如塵荷囊預卜豐年穀鵬序先推帝室姍每與  
王公拜賜推使前  
列否則必爲所擠手捧御書春帖子鳳城留鑰待歸人除  
有辭歲禮  
退時甚遲

萬戶千門總是春銀花火樹殿前陳七重鳳翽溫如玉清

宮設五色鸞賤福滿身元旦親頒福字布澤先從畿輔

始加恩錫春祺獻箴每及履端新敬書格言以進是誰補

撰金鑾記應問鈞天夢裏人

孫毓汶字萊山濟甯人咸豐丙辰一甲二名進士授編

修官至兵部尙書諡文恪

詩話文恪師門地清華起家高第過翔臺省迭掌文

衡直樞密十有二年與計恭慎徐忠愍辨章大政報

國匡時勲勲夙夜詩多散佚惟壬辰夏秋間乞假歸

里有集杜詩一卷刻行謹錄數篇東閣久疏西州

重過前塵迴

歧彌用悵然

歸田述感

江海三年客萍蓬無定居此生遭聖代高枕乃吾廬慈竹

春陰覆荒城魯殿餘開襟驅瘴癘跋涉體何如



游子久不至菁華歲月遷柴扉臨野碓土銼冷疏煙自愧  
無鰕菜人來坐馬羈四鄰何所有把酒意茫然

扶病垂朱紱低頭愧野人本無軒冕意直取性情真憂我  
營茅棟呼兒正葛巾禮寬心有適對酒滿壺頻

啁雀爭枝墜春鷗洗翅呼微生霑忌刻朗詠劃昭蘇失學  
從兒嬾吟詩信杖扶百年雙白鬢隨意數花鬚

涼月白紛紛晴天養片雲詩應有神助喧已去人羣亂後  
嗟吾在愁多任酒醺晚酣留客舞重與細論文

秋水通溝洫亭深到芰荷霏紅洲蘂亂隱映野雲多花動  
朱樓雪風含廣岸波玉尊移晚興君子意如何

夏同善字子松仁和人咸豐丙辰進士改庶吉士授編  
修官至吏部侍郎諡文敬

詩話文敬侯講幄屢上封事意存匡正平生不以詩鳴有和翁侍郎句云學問大原先定靜朝廷元氣是和甘具見古大臣風度

邵汴生師招游南淀觀荷

小霽天光四野青  
芄芃禾黍地含靈  
偶陪康樂游山屐  
如到坡仙喜雨亭  
入座煙雲俱改日  
親人魚鳥亦忘形  
還期薄海和甘洽  
社鼓鼙鼙報賽聽

趙佑宸字粹甫號蕊史鄞縣人咸豐丙辰進士改庶吉士授編修歷官大理寺卿有平安如意室詩鈔

焦山古鼎歌

昔我視學聖人邦  
獲觀禮器心則降  
丁巳已爵燦成列  
奇文斑駁聲琤琮  
今我出守來京口  
又見周鼎神爲雙  
形奇製古非近玩  
雲雷周匝光黯黮  
史游皇象不復作  
後儒窺

測皆筵撞世惠無專文互異辨論嘖嘖徒紛囋抉剔根本  
賴博雅新城詩筆健能扛惟王召史冊南仲頗側弗作爲  
駿厖用錫彤矢戈琬戟鑾旂鎗勒干矛鏃篆銘在腹永寶  
用想見人厚工亦龐有明青詞恣饗養負之而去西渡江  
雲煙過眼覆公餗巧取豪奪何愚憊神物豈爲權貴用言  
歸淨土伴經幢鈴山已同冰山倒焦山終古長崆峒我來  
管領行自愧會當與汝居空徕摩挲吾亦愛吾鼎賴汝永  
永鎮驚寵

洪昌燕字敬傳號張伯錢塘人咸豐丙辰一甲三名進  
士授編修歷官工科給事中有務時敏齋存藁

陰平曉發

又上長途去行行趁馬蹏人將殘夢遠天入大荒低皓月

澹將墮黃塵濃欲迷緬懷袁太傅舊治覓碑題

發蘆溝橋

咫尺皇畿近關門勢壯哉河流從北繞山色自西來寰宇  
遵涂共輶車發軔纔良鄉今夕宿星斗望中臺

潘祖同字譜琴吳縣人咸豐丙辰賜進士改庶吉士有  
竹山堂集

范蠡

聽罷文臺一曲琴功成宜退急投簪當年烏喙能嘗膽絕  
世蛾眉尙捧心舊友縱緣三術誤新恩還共五湖深扁舟  
無復觚棱夢虛牝君王座右金

宮怨

前殿承恩者而今寵亦衰妾顏猶未改惟有鏡臺知

郭長清字懌琴號廉夫臨榆人咸豐丙辰進士歷官刑

邵郎中有種樹軒詩草

詩話咸豐癸丑粵寇北犯津門廉夫時家居縣吏與  
拾園練扼要固守寇亦引退未相犯也及通籍官西  
曹嘗領提半善視諸囚勤懇  
惻怛事輒爲一詩存集中

山村晚歸

夕煙低冑綠楊絲路畔醅醖落幾枝廿四番風春到尾初  
三夜月細如眉依稀人語樵還舍轆轤車聲犬吠籬城郭  
歸途猶十里吟詩不覺馬行遲

登孤竹城樓

檻外波光靜不流夕陽城郭萬家秋青莎斷岸人呼渡黃  
葉西風客倚樓遼右山河千古壯燕南烽火幾時休戎機  
無與書生事惟願羣公借箸籌

陳壽祺原名源字珊士浙江山陰人咸豐丙辰進士改

庶吉士授刑部主事有纂喜堂詩橐

詩話珊士溫粹好學改官刑部勤習曹事暇則事吟  
詠怡小學歿年三十九其軀自京至浙李越縯哭以  
詩云西風斜日奉江船故人桐棺來自燕素旌飄蕭  
記官職道旁見者皆潸然君生與我齊年齒孤童擢  
科取祿仕三十頭白由苦貧四十為郎竟長已前年  
我歸哭周侯去年孫楚歸山邱今年又復慟君訃而  
我朱顏安得留元化推遷古難必豪傑聖賢同一壠  
若耗心血留文章難得黃金買功業君今有婦能養  
姑兩兒解事能讀書小兒稚女不索孺歸享貧賤無  
憂虞君幸返真游太初脫離羈紲周八陟况復泉下  
多酒徒我今哭君何其愚

書寄陳畫卿書尾

欲歸還小住杯酒許重斟信宿分離後相思直到今大江  
流遠夢小雅託哀音記否中山夜繩牀聽雨心  
喜得家書口占長句

又是山城半載過客中是處寄吟窩人如明月圓時少友  
似東風散處多一第艱難負燈火十年貧賤託詩歌家書  
乍報高堂健今日春暉喜若何

春晚卽景用中表李越縵太常

慈銘韻

睡起靜無事茶香分外清雨餘飛燕重風定落花輕草木  
有新意軒窗愛晚晴欣欣無可說相對一忘情

上潘伯寅光勳師

不分瓊瑤盈手贈開緘涕淚欲霑襟天涯有母同高餓歲  
暮無人念苦吟四海倉黃爲客慣十年貧賤受知深感恩  
不敢師門說風雪天寒一寸心

韓欽字螺山蕭山人咸豐丙辰進士官內閣中書有閒  
味齋詩鈔

君臣冢

廣州北門外里許野田中有土一抔相傳爲明唐王聿錫及其大學士蘇觀生合葬處

君臣冢耕者破塊立致靈異

荒朝遺跡賸殘塋片土壘然未許耕死後孤魂臣戀主生前大號弟承兄興亡轉眼成優戲逆順平心聽史評一例宗盟餘塊肉匡山猶咽怒禱聲

沈秉成字仲復歸安人咸豐丙辰進士改庶吉士授編

修官至安徽巡撫署兩江總督

詩話仲復師早入翰林有聲山侍讀外轉監司自常鎮調任蘇松太道以周知外事著聞於時所至導民蠶桑之利今滬人祠祀之擢蜀臬引疾僑吳中葺費門陸氏涉園故址有泉石之勝繼室嚴夫人永華工丹青詞賦遂名之曰耦園光緒八年卽家起爲順天府尹兼譯署除閣學署少寇出撫桂皖一權江督爲人和易好獎掖後進從政尙寬而務持大體時事陰賴保全二十年內召以病暫還卒年七十三生平雅愛金石書畫所收蓄皆精絕手自攷識多散落人間始在京師得沂陽石剖之有魚形因以鰈硯名廬



與嚴夫人有聯吟集一卷刊行他  
作多不留藁輯存一二以見其繁

自竹溪返硤石舟中

雞蟲得失不須問我與沙鷗意共閒此去郵程無百里近  
來詩思在雙山峭帆幾幅水雲外老屋數椽煙樹間欲借  
樵風一相送有人觴詠遲余還

耦園落成紀事

不隱山林隱朝市草堂開傍闔閭城支窗獨樹春光鎖環  
砌微波晚漲生疏傳辭官非避世聞仙學佛敢忘情卜鄰  
恰喜平泉近問字車常載酒迎

時子青師  
寓拙政園

錫縝初名錫疇字厚安一字後諡號淥缸滿洲旗人咸  
豐丙辰進士歷官駐藏大臣有退復軒集

潘文勤曰厚安官戶部與尙書肅順抗遂不用久之  
事白時軍事未平度支告匱厚安迎機立斷措置裕

如長官倚如左右手以其間爲詩詩直逼盛唐乾嘉以來江浙二派之習無一字犯其筆端於書則真草篆隸無不精妙文章幹濟如此而終以疾廢天將以傳其詩歟

金貞祐銅印歌道光二十有六年歲次丙午續在西

兩作小篆文曰省差官字之印今尺寸六分重十五  
月行宮禮部造十一字旁釋篆六小字紐端有上  
字印文古雅背旁字皆徑直無趣若刀削者按貞  
祐爲金宣宗年號史載三年金主在汴中都告急  
上議遣親軍爲援宰臣恐行宮單弱迺止則行宮  
爲汴也官字蓋以干文編號也亦金制也當是年  
之五月元師陷中都完顏承暉死迺命皇太子統  
師以金鑄撫軍之寶此印其卽邇時差遣所給虜  
孔東塏博士周尺攷以建初銅尺定歷代之尺惟  
金元尺無考此印之權度在金爲何如殆不可知  
矣

銅章省差六字文鑄自金宣貞祐年續也得之澧鎬閒土  
花黝綠蝕血斑小印今尺寸六分猶存六百載上之金源  
金源興亡三甲午印虜末造迺生汝汝事宜宗自中主肯

棄中都資人取邇時建策誰崇義完顏宇迫脅更有聶希  
古烏陵用章不敢語況復承旨之宗魯遂令蓬萊閣二狐  
登樹舞三千駱駝三萬車幾月鴛留大名府入貢織珠城  
賜死苗先武尙勤遠略黃牛堡胥鼎先已失關輔歸德蔡  
州路幾許遷汴之後奔命苦印庠汝生不遇時省差攜汝  
將何之黃金甕酒銀槽馬回首故宮悲黍離花帽軍蹶杏  
花壘陰風晝卷蚩尤旗吾攷豐王出允恭迎立爲宣宗道  
人獻玉印東海侯降封旣不能禁高允殺執中又不能邀  
元師擊居庸而自召歸鎮國之李雄復不能納諫伸與琮  
無端告辭顯聖宮忍使哀痛塵再蒙盡棄關陝與山東亦  
安用此六字差印之青銅吁嗟乎安用此六字差印之青

銅

介休

介休側看未成峯攬古難舒磊塊胸不見異人文彥博豈  
無名士郭林宗近鄰雍絳頻輸粟往歲燕雲尙舉烽衰草  
夕陽殘雪路原田每每說堯封

顯應寺

今之顯應寺仍在黃村西此寺所原始在明天順時奪門  
酬功自亨軌先是北征諫者誰上有鄜野王直職事之百  
司下有陝西呂氏之一尼其餘公侯私屬五十萬同爲土  
木之潰師乾坤旋轉辟復正御妹有言君思之爰構梵宇  
跨林麓嗣述尼功書之碑雨帝歸來城隍竄手敕三通褒  
女冠天地陰霾少保魂山川金碧皇姑殿官家此舉太無  
名乃將梵嫂爲邦媛若憶當年諫北征何爲追念王振刻

木形自是裕陵脾親愛不以阻諫關重輕雲窗霧閣華山  
女青鳥儻自通丁甯不者六軍所駐婦孺驚尼也走匿且  
弗暇敢爲叩馬之軀生泊乎承寵七十載檀施千萬頒掖  
庭可憐一炬崑岡火香界茫茫無限情

### 後園

退處多餘地閒中盡樂時石呼兄弟輩樹有子孫枝尙可  
三年學當吟五貺詩仲宣無事事何必覆人棋

虛籟風三面清陰木十尋偶書亦退筆自拊斷紋琴爲愛  
隨時景能安現在心方塘春草綠休養一何深

經訓兒能授疆場弟未還一身居燕燕兩目夜鰕鰕此境  
眞如水何緣更出山蕭然無去住遮莫是禪關

竹珊以滇南方伯抗疏爲伊犁參贊壯哉行也歌以

送之

壯志縱橫九萬里  
蔥嶺滇池咫尺耳  
抗疏干言達帝闕  
不爲方伯爲將軍  
將軍投筆據鞍笑  
班生未老賈生少  
整頓乾坤濟時手  
會滌九川宅四隩  
講求兵法常山蛇  
變幻名場君子豹  
甯從絕域鑿凶門  
肯傍貪泉開飯窖  
我朝有造西陲西  
爲城康居國車師  
不消冰雪成道路  
無邊沙磧相驅馳  
窮荒大漠版圖共  
蠅蚋喘喙言笑譖  
六合如人及其壯  
氣之所貫神與隨  
將軍將軍氣如虹  
武功可救文治窮  
不者何爲投袂起  
欲以將洗吏之恥  
只今圭瓚錫甸宣  
虎拜祝天千萬年  
九重夜半虛前席  
西顧何如聚米山

漫興

三復葩經及考槃  
幾曾古井起波瀾  
仰邀明月同心少  
凝

恨斜陽獨語難暮暗朝唏渾負負雲愁海思闊漫漫願將  
殷浩書空字寄與蒼冥一笑看

董文煥初名文煥字硯樵洪洞人咸豐丙辰進士改庶

吉士授檢討歷官甘肅甘涼道有峴樵山房集

詩話硯樵詩境清迥寄託遙深值咸同之間軍事方  
殷多感時之作集中與王定甫馮魯川許海秋諸人  
唱和最多詩格亦相參斷已躋坊局分巡關隴  
如檢書及經院署諸篇殊有玉堂天上之思也

游龍子祠

清溪路盡只桃花茅舍無多逐岸斜偶趁樵風忘路遠眼  
隨飛絮過鄰家

鼯鼠篇

鼯鼠食牛糝口實甘角之觶觶爰飽爰饒豈不覈觶乃餌  
以飴匪惟忘苦反嬉而恬一恬一齧用售其貪牛身如葉

鼠口如蠶繭粟有盡果腹未厭剝膚孔亟以痛厥心牟焉  
長號命隨以斬嗟爾利口君子何堪履霜有始由來者漸  
夫焉處之不惡而嚴

盆松篇

鬱鬱盆中松矯矯當風舞葉葉相承接枝枝相黨挂青陽  
發羣萌蔥蒨自媚嫵以彼干霄姿甘此玩好伍灌溉豈不  
勤涓滴澤已溥焉知生性漓憔悴氣莫吐深山有孤根夜  
夜听雷雨上枝巢鸞鳳下枝卧蚪虎神物遇有時那許問  
斤斧歸然七廟尊丹腹作梁柱陋彼盆中質終年依淺土  
斬伐雖無憂尺寸安足補託根良獨難棄置等灌莽躁進  
與晚成豈不在自取

次韻魯川讀史柬王定甫

拯

農部丈作



信有文詛楚空聞書絕秦受金還舉袖料敵失望塵危等  
沈舟羽安忘厝火薪伊川歎被髮誰是百年人

秋來

落日悲羌笛西風怨漢歌心難填海盡力奈負山何魑魅  
高明避英雄草澤多秋來晴霽美未改是天和

何事

未失神亭戟俄空旅舍煙經綸書卷外涕淚酒尊前碧草  
誰埋血黃圖憶拓邊齎糧方待寇何事問燕然

姑從

書城坐擁夜鐙勤百感蒼茫付暮雲湫隘一廬猶負郭鬱  
陶三月倍思君近招元亮傾新釀遠弔靈均續舊文不爲  
苦吟吟更苦姑從嘲笑日紛紜

紀事一百韻

維嗣皇踐阼辛酉十月朔賢聖作繼七乾坤辨御六聯珠  
集星躔合璧光辰旭天與百神享人歸九族睦亶聰明作  
后念終始典學端拱撫華夷闢門咨牧岳舉善無遺賢省  
刑不留獄窮奇歆授首朝廷一澄肅霜霆互震滌日月新  
櫛沐文母佐十亂家相咸二叔再光中興業一洗舊染俗  
寬大詔頻頒忠厚基更築光光繼述美翼翼夙夜勛皇道  
彌正直皇風益清淑憶昨庚申秋國步初反覆禍首晉鄭  
依王風變中谷朋家作撫惡顛趾負優渥太阿一倒持傳  
翼擅威福清流務盡殲宵小屢升擢貴賤劇趙孟彼蒼易  
寒燠澤竭網日密民勞土日蹙豈徒冠楚猴忽欲指秦鹿  
郊壘誰之恥忍進釣天樂致令歌板蕩不得同憂辱驚波

滄溟來瀕洞昏地軸豺虎走封畿蛟鼉起平陸太白再經  
天熒惑不肯伏威弧罷張弩枉矢憂集屋烏上延秋門倉  
皇夜避啄月黑憑城歎六師中野宿連營散秋葉狼藉兵  
革粟眼見不得收兒戲寄帷幄百年備不用藉寇無疑卜  
古有飛一箭今甯折一鏃豈聞骸可爨無復指可綯遂使  
太平民展轉脫萬輻飛火通甘泉陰風動艮嶽搶攘終夜  
聲竭歷三面祝發鶴一怛化沙蟲萬出縮惜哉雲西北悵  
矣月眺胸問誰致此繇人百身莫贖泣欲排雲叫天遠萬  
重曲平生懷忠信敢謂莫予毒九回一日腸千里雙寸目  
憂來成內異顛倒怪童僕性命甯關人排遣藉篇牘時從  
馮與王日夕醉鄴醪人事尙紛紜予醒安忍濁豈效徑寶  
由而希巖穴躅余情固未傷余分亦云足亂離一朝定關

市罷酤權輸金高邱山賜醺紛烹剝疇資和戎絳終賴退  
秦燭一言同蘭臭連券比荀束列聖赫在天兆億徧亭育  
鐘虞嚴崇樹闡閭仍肩轂國命靈長新羣公容珞琢存者  
幸遷延亡者惜顛仆奈何梟鴟輩睥目猶睚腹百計冀言  
售致禍恐不速誘衷莫假手何以饜爾欲自有師尹腸誰  
食伍參肉塞粟猶勤輓邊衣尙寄縠悠悠天門遠慘慘雪  
霜酷招搖未回星榆柳忽改木地僻离彪羣寵深怨詈篤  
連垣樹桃李比戶具貝玉捋鬚誰敢問坐榻莫爲逐况聞  
郿塢營丹楹而刻桷金紫耀輿臺風雷生掌握歟出夜半  
紙眞僞誰能覺崩圯逝髯駕飛騰阻日輦惡流豈盡海姦  
誅欲罄竹似厭王侯尊急登艷嶽錄寇木爭自貴燎原方  
未撲屯餘端養蒙剝極肇敦復義馭俄再中星占驗三瀆

迅耳不及掩哺食豈待尊肩輿下檻車手笏生桎梏面覲  
市朝涇魄驚鈇櫨觸佞血污霜刃臭骨點素幅罄旬恩鵠  
孟肆衢快難卓始悔外生成不及早天祿生爲華堂貴死  
爲天下戮不勞羞乃祖圯族愧世祿昔聞誅國忠唐祚興  
巴蜀又聞排六姦宋運延鄆濮當時義士奮聽熒斷未獨  
屈勉迫羣憤牽攀逼他族豈若隕自天聲色無急促女中  
旣堯舜禁中更頗牧深謀翦凶慙坐鎮淨埯黷流輝一下  
照四罪咸率服反思初階戾內訌異瘳疾省括苟未審何  
能發中鵠嘗劇句踐膽生難燕國角明明宗社神烈烈楨  
符錄行當落旄頭再與安鼎餽元和韓公誦治安賈生哭  
小臣職載筆賡歌古人續

秋夜柬顧齋

秋聲無深淺深淺在一心秋聽無遠近遠近同一音月落  
樹影合磔磔驚棲禽長宵畏短夢醒坐還披襟時過意自  
悔跡往情彌深焉知來日事追念不及今寸腸積萬感并  
入秋風吟秋風亦何爲空使年鬢侵

會經堂海棠用坡公定惠院韻寄懷林穎叔京兆王  
廷尉定甫丈

會經堂前饒眾木不與凡花溷幽獨旬日文書苦困人眼  
前何物能醫俗朝來繞樹得休暇忽驚身在錦繡谷露萼  
回看紅映窗風枝印見高過屋不嫌簾燭隔霄漢但恨樓  
臺少竹肉添酒從招月下魂宵深清夢猶難足聞道京兆  
手親植新年正及春景淑當時廷尉聊戲言雅話居然屬  
饜腹詎知勝事偏我值蔚蔚充庭如立竹秋風兩度牽詩

懷閉戶蓬蒿森滿目今來賞心已天幸未免聯吟更望蜀  
花開安得二公同傳語西飛寄兩鵲賞者不栽栽不賞世  
間萬事總回曲後來桃李應更多好愛棠陰勿輕觸

西山紀游

晨光結晴霞林旭遙相著荒橋阻車轍谷轉每前卻中峯  
忽屹立攢空利如削稍登乍眩旋迴睇更輝燿巖留太古  
樹礪蓄長生藥卻穿陰磴苔樓閣倚天豁木末辨觚棱雲  
端識赭堊歛臨清淨宇萬想皆擺落

萬松爭到門千年不可計九枝蒼龍蟠動卧非一勢山氣  
午方合谷鳴萬竅閉泠泠青飈來僧梵遠相替花雨散香  
界風濤隔人世璇楹旣嬾娟紺宇亦澄霽庭翠秋更殷巖  
紅日初麗回視來途窮千盤石級細

九峯勢迴合靈境依此選竹藏溪路深松覆山殿滿仙壇  
富芝菌師塔飽落蘇鼎氣丹艘混香煙龍虎篆曲沼觴流  
羽蔬廚水通篲風清鳥聲悅日霽天容善雙趺跡猶存二  
青蛻未遠盧師幾時去枯栢經年斷訪古足流連探奇愈  
紛衍黃金布初地大樹斜陽晚

古殿耿佛鐙更深還獨往一氣失樓臺觀空遠無象經梵  
出雲中尋聲不知向四山合混茫迴立霄漢上萬緣此時  
靜下界聞雞唱夜氣方返初機懷皎萌曩豫惜遄晨駕暫  
許謝塵鞅曙色收孤煙東峯一星朗

經院署有感

十年方補外補外亦蹉跎科第慚先達飛騰讓後多葡萄  
甯許換苜蓿自能歌回首金門路何時定再過



檢舊書有感

書叢半世如枯蟬結習生小性所耽博學常思追任昉聚  
書每欲希桓譚當時未行萬里路捆載那計隨征驂連牆  
架屋恨難足此樂不易吾心甘春明一侈事奔走卷束往  
往封塵函猶幸枝官飽閒放海王村畔時幽探更從鄰好  
乞佳本夜闌燭盡猶勤勘豈知離合到簡冊鋒車關塞趨  
趨遽頻年搜羅終何益行篋無十之二三自顧四壁曾不  
保檢書未竟中懷慚百不如人賴此耳併斯不畀夫豈貪  
舊墨過眼歛隔世春夢回首成優曇仕宦不進學亦退局  
促似我真何堪且呼長恩酌酒拜投効終當同一菴

留別伯寅丈

干戈擾擾行焉往身世茫茫願總違海內終關儒者事尊

前已覺故人稀才疏蔣琬歸田好親老王陽叱馭非霄漢  
從今相憶處窮愁莫惜卧巖扉

李應莘字稼門長安人咸豐丙辰進士河南候補知府

有雙桐書屋詩賸

詩話後門於同治初參多忠勇公軍事後以知府需  
次於汴卒年四十六遺集爲其姪崇光所刊詩學唐  
人尤愛昌谷思爲瑰詞奇  
語而才力不足以副之

暮登望江樓

古木帶斜暉空城鎖翠微遙帆際天沒孤鶩破雲飛寒色  
一江遠輕裝何日歸關山塵土淚消盡老萊衣

寄遠曲

桃花開春風來楊柳暮春風去春風來去年復年楊柳桃  
花總如故與君離別三千里鴻雁不來錦鱗死思君祇似

東流水

觀音峽曉發

春水萬千程孤篷更遠征峽雲高欲落江雨細無聲酒逼  
寒威薄香盤曉篆輕由來看異境不算負生平

雜詠

牆頭森森萬竿竹許借濃陰傍華屋故宅荒涼扃復開百  
年幾見人歌哭春衾夢斷聞曉鴉湘簾不捲波紋斜夜來  
風雨解人意小紅開徧林檎花

錦波瀾瀾錦鱗美尺書中有相思子柳枝枯盡江上青兔  
走烏飛速如水去雁聲遙不復回煙江幾日風帆開酒香  
百甕潑春綠惆悵故人殊未來

廣漢早發有寄

荒雞啾啾曉鴉語紅燭無光日華曙平橋十里煙火青是我當年送君處別館荒涼鎖碧煙閒門長徧青苔錢馬前惜別忽如夢飛絮落花皆悵然悵然卻下金牛道古恨如雲寄煙草翠柳千條折更生只愁折盡行人老

李長吉古錦囊歌

冰蠶吐絲絲不絕軒如碎織西陵雪裁成金彩錯明滅紫鳳天吳繩百結隴西年少長爪郎天街走馬神徜徉鑿空造化泣眞宰啾啾鬼語盈空囊囊中驚人詩句好召赴玉樓何太早劫火燒殘金鳳皇荒煙冷繡秋墳草

華筵引

桂枝吐秀蘭芽芳鸞章鳳綽何輝煌黃金作壁玉作堂滿堂絲竹彈清商侍女如花粲成行珠環玉佩聲鏘鏘八珍

五鯖遙相望  
蟠桃冷咽崑崙霜  
玉缸酒瀉眞珠香  
勢迴北斗傾天漿  
庭中白鶴相翱翔  
雪眉霜鬢垂明璫  
靈壽杖扶康且強  
義和叱馭回扶桑  
壺中日月如年長

喜晤謝麀伯同年卻贈

寒蟾泣天雲色愁  
潺潺雨滴空堂秋  
故人一別渺千里  
夢魂遠寄湘江頭  
宵鐙結花朝鵲噪  
扣門如雷君忽到  
青袍白馬舊少年  
握手相看同一笑  
聞君慷慨從西征  
男兒意氣何縱橫  
中興諸將半茅土  
十年事業雄書生  
雨窗翦燭飲君酒  
一讀新詩一搔首  
燕然萬仞高嶙峋  
看爾磨崖字如斗

貧儒歎

有儒有儒拙且迂  
十年手寫巾箱書  
長安同學半卿相  
簞

瓢陋巷今何如東家富兒好鞍馬終日馳獵城南隅左臂  
倉鷹逞雄駿仰笑右手牽韓盧西鄰大賈饜梁肉百萬一  
擲輕擣蒲烹羊宰牛召賓客暮聞絲管朝笙竽青氈困卧  
歎何益繞牀妻子空饑呼高歌枉用泣神鬼坐令霜雪欺  
頭顱山中故人偶相訪抗論往往希黃虞捉襟見肘豈云  
病天靳智巧安吾愚盤中粗糲願同飽蔽況可採芝可茹  
吁嗟乎有蔽可采芝可茹慎勿浪曳侯門裾

春日游可園感賦

古剎尋春乘逸興名園訪勝逐清游煙雲莽蒼千章木風  
日荒寒百尺樓此地芳樽尙褰屐當年華屋已山邱故鄉  
亦有閒池館滿目歸鴉集暮愁

庚午嘉平由都返濟途中作

繁星燦滿天村大吠不已千家鼾睡時老人方夜起升車  
坐假寐輪囷聲在耳不意冥冥行已逾三十里公車從南  
來聯翩去如水計彼登程時雞鳴亦方始勞勞各未休征  
塵幾時洗

初日出杲杲人影長丈餘落日照馬首影長與之如厯厯  
數亭堠切切望空廬豈惟念飢渴意亦厭征車授餐不求  
飽適館不擇居頽然引枕卧夢境翻遽遽勞生守田畝此  
願終恐虛

數里一更棚上書護行旅視之闕無人卽有亦奚補官事  
成具文弊端不堪數平心究所由亦有難言苦廉俸豈有  
盈凡百皆責取豈第奉旨甘兼須活男女豈第延賓朋兼  
須飽僕圉往來盛供張交游竭資斧事事期振興其費出

何所既乏點金術多事或招梅計較成廢弛江河此終古  
寒鴉已歸林行人殊未息遲發多戒心投店反昏黑幸有  
賢主人殷勤拂塵席盤盂進清水一洗憔悴色微風扇紙  
窗短檠搖寸碧疲馬卧不喧冷月照虛白故鄉好圍亭觴  
詠集疇昔松菊手自栽夢魂三載隔羈愁遣已難寒柝況  
永夕

閩鄉道中

長隄新柳綠婆娑山鳥驚颯客又過遠水平鋪帆影少春  
沙細疊縠紋多亂蛙向夕鳴深澗病馬嘶風立斷坡見說  
潼關鄉樹近今宵旅夢復如何

王闔運字王秋湘潭人咸豐丁巳補行壬子舉人光緒  
戊申賜翰林院檢討有湘綺樓詩文集



詩話自曾文正公提倡文學海內靡然從風經學尊  
乾嘉詩派法西江文章宗桐城王秋後起別樹一幟  
解經則主簡括大義不務繁徵博引文尙建安典午  
意在駢散未分詩擬六代兼涉初唐湘蜀之士多宗  
之壁壘幾爲一變尤長七古自謂學李東川其得意  
抒寫脫去羈勒時出入於李杜元白之間似不得以  
東川爲限

### 城上月夜

浮煙暗一城孤月四邊明漁火動多影湘流靜有聲風高  
寒望眼漏永逗秋情危磴荒池外清時草漸生

### 雄劍篇贈別李伯元

雄劍不希世光氣騰紫霄登城敵頭白揮手明星搖千秋  
神怪有離合滿堂華燭風颯颯此時起舞翻離觴六月寒  
雲欲飛雪彈鋏辭君歸故山白波九道流潺潺請君直斬  
長鯨背洗劍秋河明月寒

龍生行送皞臣往南昌兼送李篁先

龍生別我當爲客青波平挂章江席同時李子好遠游書  
劍蒼茫無所適良夜迢迢接深語此時愁坐揚雲宅兩君  
三十同不官大壑梗枿天所惜東南民氣復蕭瑟慘淡空  
懷濟時策高名落拓難棄置猶與諸侯掌書記洞庭有客  
方歸來憔悴青衫不如意槭槭芳洲弔禰衡長江浪急空  
山平夏口蕭條託黃祖庸才敢與孫郎爭書生傲睨當時  
事塞默無言有深意祇將詞賦掩奇才肯向荊州出奇計  
文章得禍非所料孔公歎息曹公笑蹭蹬於今又一時掉  
頭誓擬終屠釣彭蠡湖外鼓聲死江風夜起黃州水堅壁  
同時走督師旌節相望二千里君今投分向人間挾策何  
曾敢一言衣冠南渡荆揚遠鼓角西來江漢翻黃昏塵滿

別雲暗送子歸來方閉門

寄懷辛眉

空山霜氣深落月千里陰之子未高卧相思共此心一夜  
梧桐老聞君江上琴

春社日往邵陽道中雜詩

作客真成計逢春定別家故園風過柳殘月夜依花歧路  
馬猶顧輕波鷗自斜離心共芳草著處便天涯

細路引沙圻墟人趁夕暉煙深鐙影大舟泊水聲微晚渡  
爭操楫春寒懶換衣垂楊最關客迎送總依依

送蔡與循

曉色初明白馬嘶北巖雨霽秋鴉颯相逢十日正堪別門  
前枯柳幾人折西風吹水浮馬蹏東阡南陌無端倪樵人

自問下山路歸客今過青嶺西五年相識干戈後往往空  
村共杯酒近聞下詔徵賢良與子才名在人口田舍老翁  
莫論事洛陽狂生長太息拂衣徒步且歸來看劍縱橫淚  
霑臆城頭畫角蕭疏鳴舍傍秋草晝夜生驅車莫作遠游  
賦悲歌聊擬少年行昨夜微霜入羅幙美人獨夢錦衾薄  
陵上桂枝風下零月裏松子衣前落仙女山中紅樹深相  
思咫尺碧山陰斜陽寂寂石林氣雲冷煙空何處尋

與循行日同送陳希唐令弟汎舟下湘別於明岡渡  
口余騎送與循至石灣歸行涓岸復遇陳舟遙語  
而別

清秋風日宜別離石灣雙折垂楊枝醉把金鞭入紅樹坐  
看孤棹出青谿谿回路轉秋煙繞咫尺千重隔芳嶠馬上

相逢舟上人遙遙語笑風吹到道旁回首各東西客子經過意不迷蘆洲碧水隨秋雁茅屋炊煙聞午雞雲山十日同游衍雲林幾曲仍相見別後誰言卽歧路歸來孤坐懷清晏高樓寂寞向黃昏獨想行舟拂月痕空江夜泊親漁火微路潛行度石門秋山遠近尋煙樹迢迢自作懷人句晚津驕馬渡頻嘶長記停鞍送君處

喜聞官軍收復九江寄胡巡撫

喉舌通三省脂膏盡五年分憂羣帥苦聞喜萬人傳破竹成今日栽瓜滿廢田便應乘夏水浩蕩起戈船

日月光麟閣風煙望鶴樓轉糧關內相籌筆武鄉侯夾道弓刀肅橫空江漢流書生能料事虛作杞人憂

力戰誠孤注兵機有萬端遺民翻涕淚百勝轉艱難日落

江潮白城空夏木寒向來論進取不獨守凋殘

傾國論軍賞酬功恨爵稀竟聞收大郡不愧總戎機翠羽  
貂邊玉鷺黃馬上衣看君邀異數感激在鸞飛

倦客看城郭他年厭鼓聲轉蓬隨馬足移柳舊烏嚙子弟  
元從楚風雲勢壯西夜深看北斗長劍自提攜

重游南昌東湖水亭

湖亭衰柳對金隄石橋霜色曉淒淒青谿往事隨雲影細  
路孤行信馬蹏孤行影照澄波碧荒草覆煙寒寂寂酒客  
亂離今半死僧童長大猶相識水閣陰連花島彎還從碧  
檻望紅欄月明古樹無鴉宿雪外西山見鶴還半房初日  
門空鎖深殿微風明佛火愁裏難吟訪舊詩客中暫得焚  
香坐闌干寸寸是前游去時悵惻到時愁紅顏對鏡初嫌

老碧藕無花早過秋懶性從來甘寂寞物論逍遙無住著  
解道波瀾起寸心始信人間有哀樂當時豪竹併哀絃一  
罷清尊便五年後夜相思夢渺渺祇餘孤月照糊煙

富陽

玉瓦映朱樓雪照千家縣深林翼孤峯煙擁三重觀青瀾  
旣潭沲寒樹猶明蒨悠悠扣楫謳渺渺驚鳧亂賞心不假  
言餘秀殊可翫

酒集法源寺送龍知縣汝霖試用山西兼贈郭編修  
嵩燾尹御史耕雲郭新從大沽防營入奏兵狀與  
尹言夷務故有是贈

朝作白頭吟夕代東武謳西風一夜起秋色滿堂賓客增  
離憂送君西行太行道滹沱連雲沒秋草人生富貴須少

年倏忽窮愁至將老京華來往十四春布衣疏食家仍貧  
只言白璧報知己惟見黃金賜近臣一旦繁華人事改百  
道鯨波噴滄海匣中寶劍三四鳴萬戶侯封不相待坐中  
有客奏兵機絕國蕭條無是非空開西域蒲桃酒且盡牆  
東鸚鵡杯持杯卻問霜臺客祇恐中興有遺失致君堯舜  
公等知七疏書成萬人惜卑官落拓更可憐嗟君欲去知  
君賢莫辭便作折腰吏何時得種公家田從來形勢稱三  
輔太原雄關任腰膺借問年年汾水秋卽今誰作并州虎  
此別東西各自悲古寺鐘鳴來客稀惟有鳴蟬聒人意夜  
來唧唧在高枝

自京赴濟南途中秋興

南苑依依柳猶能送客驂微生天意惜孤影別愁堪曉月



供憔悴征鴻度兩三淺黃深碧外只是憶湘潭

十二橋邊樹枯薪尙有根西風亂蘆葉孤月出關門蹕道  
悲龍過寒塘獨鳥喧 先皇全盛日生晚共誰論

馬色渡河秋蕭蕭向德州江淮今罷運馮李昔潛謀久重  
平原守閒看隔水流羈愁不成夢那更聽齊謳

駐馬官橋側郵程數再經河流蕩日白山色背天青晚麥  
疲民種荒田積水腥應憐風土變休喜似湘鄴

入西山從潭柘寺東澗至山亭

幽柏澗半青芳草徑初碧參差重閣外峭蒨山四壁入門  
松風起偶坐溪亭夕靈泉度煙響歸人共鴉息暫聞清梵  
落始覺心未寂暝色春濛濛孤此雲外石

瀟碧房聽階上流泉

瀟碧延清窗掩映三竹林坐對白雲暮安知溪水心微風  
又如何厯厯一鐘音春心夜始寒想像空山深幽夢斷復  
續吾其觀古今

從戒壇下至可羅村

壇空松陰陰山色春更靜風移龍蜿蜿雲散日靚靚飛襟  
一里翠度石雙屐冷娟花不出谷獨對山露醒芳香路之  
半遠近自春影日暮逢歸樵相看在地境

贈翰林周學士壽昌

長沙學士才名羨澄湘臺下初相見當時鼓角翻江波取  
別恩恩若飛電七年卧病黃鵠磯卽君留滯周南時漢口  
霜裊凍衝網有酒相呼斟酌之我年未壯君已艾眾中許  
我傾流輩鸚鵡洲前狂笑來禰衡驚起仍相怪古來盛名

多零丁看君早入承明庭浮雲富貴長過眼三台跂足如  
蓬瀛嗟余抱玉求高價白鬚趨走都堂下人生得失苦相  
欺與君同被時人嗤一回相逢一回老惟有詩思如嬰兒  
郭侯知君復知我酒邊論君每移坐爲言年少妒風流高  
堂挾瑟雙倭髻卽今老去看文君絲竹餘音不忍聞頗憶  
東山謝安石遠愁西第沈休文南窪明月清光絕古往今  
來圓又缺且應擊缶對高吟莫遣當窗照華髮彭門曉樹  
映宮樓冠蓋憧憧車馬流持戟同僚揖王董登車新雨論  
黃周元亭寂寞秋苔綠季主逡巡不能卜西風落葉閉重  
門悄然坐夢深巖屋余亦長歌歸故關白雲幽澗水潺潺  
他年乘興一相見分作淮南大小山

瀟湘秋夜雨曲

九疑雲破天難補年年迸作瀟湘雨水驛無更秋被寒木  
蘭船背如繁鼓二妃老去雙蛾綠月過璇宮冷階玉祇將  
清淚報深恩分付三竿兩竿竹秋長雨細無人聽流落蠻  
荒幽咽聲琤琤滅滅止還作鴛瓦明鐙俱有情關河何處  
無秋雨淚粉噉花不勞數省識瀟湘萬古愁獨眠獨夢看  
看曙

馬將軍歌

河南馬德順者前爲湘軍馬隊將余在祁

留江浙補鎮將矣及閱陣亡冊乃知其於十二年  
前戰死甘肅愕然傷之爲作一詩往會侯議立馬  
隊何應祺利之而怯於敗浸取几上書占之正得  
杜集詩云苦戰身死馬將軍喪氣而止余嘗笑之  
君定不戰死詩妖無驗耶此惟余識之將廿年乃  
悟其識意者德順名不當泯不然何精神往來於  
吾心也德順官提督諡武毅

曾侯昔起田間師將用拙速勝巧遲腰鑱執挺五千眾大

捷湘上名天知當時提督一馬竿突陣橫賊風電馳南人  
好船不好馬水師萬舸橫江湄三河一敗兵如灰雖有舟  
楫無由施陸軍氣奪賊馬蹶都統揚揚建兩旗始知騎步  
定天下曹公不敵董卓兒驅勒農夫學騰跨項強脰直百  
不宜我年二十騁身手超阮墮塹拋金羈驚駘多肉驥多  
骨炎方芻稻難調治馬侯將馬識馬性如造父孫汧牧時  
是時王師苦不利曾侯避地黃山陞驛騶蹇驢盡無用相  
與蟻垤爲娛嬉據鞍一笑何生癡壯士恨不革裹尸清秋  
一槩下鄱水歸來但覓果下騎春風秋日偶盤蹀骨脈和  
協心顏怡馬侯牧方聊小用千金辭續越女蚩爾來廿年  
不問事死生貴賤和天倪偶從蠹牘見名姓使我心熱神  
備疑松陰長簟恍未冷苦戰身死眞何爲憶爾伊涼騁干

里鬱氣一吐月暈虧戰馬長嘶飲河水誰甘老死阜隸咎  
余亦放馬衡山陽夢中不聽曉角吹馬侯馬侯身死莫論  
功成敗君不見湘鄉石馬青苔滋

蒙山清茶歌

酌泉試茗平生好惟有蒙茶遠難到名高地僻少愈珍夢  
想靈芽但西笑春動岷嶓花藥香故山新茗渴未嘗石花  
露葉今始見開緘已覺炎風涼聞道仙根漢時活七株常  
應鳴雷發王褒遣僮不敢擔長卿識字名空撮貢登天府  
二千年龍袞親擎饗帝筵從此人間不曾識苔闌十里圍  
雲煙年年葉共周天轉銀泥小合盛三片至尊晨御偶一  
煎王公那得分餘羨吳越湘湖名品多祇供嬪女潑雲渦  
含霜焙火爭春早散雪流芳付驛馱一聞蜀使當秋進始

覺後時天所吝聞名乍見已足誇川網長價開中引達賴  
熬茶靜遠荒紅茶航海動西洋從來鹽鐵一時利誰言此  
物關興亡肸蠭馨香元有自百草纖微豈堪比對此沈吟  
不忍煎如觀法物郊壇裏山人掉首百不知松風一榻輕  
煙遲圍茶采采共葵菽迎涼且詠幽公詩世間遠物徒爲  
累甯知跂石眠雲味一啜餘甘復幾時支頤坐看西山翠  
忽憶君山北渚頻亂餘枯枿雜樵薪五峯深處尋眞隱儻  
遇披霞舊種人

憶江淮舊游送薛福保還無錫

錦水綠未波摩訶柳初碧東風昨更寒爲送將歸客蘭陵  
歸客感年新不待鶯囀早惜春二月雲山三峽樹五湖煙  
水一家人楓樹青青洞庭路桂楫夷猶復容與一片江南

江北春君行遠到花開處戍鼓樓船且未休石城淮浦憶  
前游謝公棋罷東山冷陸弟詩成洛水秋舊苑垂楊不堪  
折海邊芳草催鷓鴣覽古空憐瓜步潮相思吟向蘇臺月  
莫道崎嶇入蜀非君平避世久忘機借問南陽一龍卧何  
似臨邛駟馬歸

青石洞望巫山作

神山夙所經未至已超夷況茲澄波棹翼被祥風吹真靈  
無定形九面異圓虧晴雲穴內蒸積石露嵌奇江潮汨無  
聲浩蕩復逶迤呼風淩紫煙漱玉吸瓊脂賞心不期游誰  
識道曾累若有人世情暫來祓塵羈

贈于晦若自南海還蜀旋赴天津幕府

蜀國春寒連夏月江波未汎裁眉雪越中高士去復來萬



里奇游何撇烈當年孽秀采瓊英暫入金門聽鳳鳴忽然  
蹭蹬粉牆裏卻作貲郎同舍生南歸觀海海如霧正見彭  
張競笳鼓宿望高名一代無苦欲相留掉頭去狄山抗請  
誅相臣今君肯向合肥門濁河清濟竟誰是仰天一笑看  
浮雲廿年和戰憂危大只與世人生富貴賈胡反覆那足  
言案甲論兵誤羣帥伊犁交趾爭蝸蠻誰識真人但閉關  
偶從譚笑揮八極陸賈張騫相往還井竈自古嗟梁益今  
日西陲盛賓客已見終軍出散關更看馬援還京國東西  
南北盡銷兵書劍蒼茫海上行何日東朝求實用請君多  
謝漢公卿

泰山詩孟冬朔日登山作

崇高極富貴巖壑見朝廷盤道屯千乘列柏棲萬靈伊來

聖皇游非余德敢升良月蠲吉朔攀天叩明庭時雨應洽  
風開煙出邱陵仙華潤春丹交樹蓋秋青肅肅洗神志坦  
坦躋元扃既知中天峻不待超入紘翼如兩嶂趨緯彼四  
嶽亭將覩三光正端居心載甯

答贈袁章京昶袁語及西藏舊計謬以劉向陳湯相  
比因傷丁文誠慨然有作

東里樂吳縞南工論楚劍眞知世所希外賞誰能鑑余本  
支離士人形偶然犯寢跡恣閒游適來訪朝坵彼美在彤  
闥特達光圭剡瞻言彌六合計畫符深念昔參斷臂謀意  
絕英俄瞰人亡遠圖止語合雄襟憾謬許愧劉陳干時異  
鄺范風寒燕市靜燭煥清觴汎將回已灰心訂謨待君驗  
上海客舍曉坐聽雨

久別江南雨春聲似故山市喧貪曉靜舶散待潮還楚俗  
餘珠履禽言效越蠻晨門莫相訪卽此閉柴關

洞庭歸舟酬葉損軒大莊吳中贈別詩因及陳芸敏  
卅年不見林屋山東南竹箭靑琅玕江山才俊相映發使  
我萬里開心顏石林才子文章伯暫學陶潛出彭澤故人  
假節選賓僚拄笏情秋看山色鄭公子陳翰林外臺三妙  
成知音山塘黃花五湖鱉一醉可抵千黃金怪君來遲惜  
秋暮放我扁舟踏霜去鄭君寫作紅樹圖青山一髮南徐  
路圖背題詩別思深夢中吟想見君心折腰便作塵中吏  
揮手還思海上琴祇今海內風流歇世業傳家只閩越林  
陳鄭沈多故人春蘭秋菊長無絕君家傳經比賀劉豈但  
詩句陵滄洲山中舊宅松竹好眼底浮雲風月秋新篇舊

製落吾手應勝與君三日留長江浩蕩白鷗冷南州冬樹  
青青影歸舟乘月過君山猶似吳船酒初醒

生日湘東公寔夜還行雪阻風待纜雞鳴始至

其日復真

侍行

積雪初晴冰不圻湘干車馬踏瑤瑤冰絃玉笛寒更清羣  
公張宴敷重席良辰見招余降辰飲賓恭命從介僕垂髫  
黃口願觀樂華鐙細麝香氤氲玳筵管長未終曲三更紉  
鼓回明燭席間歌韻猶繞梁船頭槳聲如軋玉中流風急  
湘波高頽雲四合寒雁號漁燈盡黑城郭暗孤舟篙折烏  
篷搖二雛斂翼不唧唧忽如荒江失檣楫蘆中夜雪呼不  
聞冰天萬里炊煙絕舟輕火滅風更顛呼僮一笑且藏船  
窮途歲暮有羈旅老幼關河常屢年此時端坐百慮靜萬

事從心不由境坐中階下一翻覆樂極悲來在俄頃列炬  
來迎鳬雁驚層樓列榭眼中明歸來只話宴游樂冰雪蕭  
條非世情

暮雲篇追傷郭兵左嵩壽

暮雲忽失雙飛鶴古戍荒林愁日落湘川楓樹晚猶青千  
里煙橫洞庭白獨寐長宵霜入幃雞鳴庭樹曙光微枕上  
分明見君去尊前始惜故人稀憶昔征車梁鄭陌酒鑪對  
飲狂歌窄天子臨軒問左生中丞置驛迎歸客中原急難  
須奇才自覺嶽嶠懷抱開鼙鼓連天箭滿眼與君醉上羊  
公臺卽今空洲卧寒月兩賢電火餘光絕九洲耕織江海  
清野梅官荻花如雪自古豪雄全盛時也知功德百年衰  
意氣甯甘鄧禹笑琴歌不爲雍門悲身逐驃姚肯馳騫看

人勝負還相誤行向西州痛哭回坐吟南郭灰心句雲散  
風流不復論游談猶羨李膺門龐公不愛入州府五噫寥  
寥非隱人

齊河道中雪行偶作

六月炎州火作山冬來河朔雪盈鞍冰天熱海閒經過未  
覺人間萬事難

六花偏傍錦裘飛溼盡重襟火力微湘綺樓中他夜雪好  
將鴛瓦當油衣

晚晴移詩匯卷一百五十五終